



Bosna i Hercegovina
Federacija Bosne i Hercegovine
Tuzlanski kanton
OPĆINA GRADAČAC

H.K.Građašćevića 54, 76 250 Gradačac, telefon 035-369-750, fax. 035-369-751, e.mail: opc.grad@bih.net.ba, www.gradacac.ba

OPĆINSKO VIJEĆE

Na osnovu člana 36. Odluke o uslovima i načinu držanja pasa, te načinu postupanja sa napuštenim i izgubljenim psima na području općine Gradačac („*Službeni glasnik općine Gradačac, broj 08/2018*“), člana 28. stav 4. Zakona o zaštiti i dobrobiti životinja („*Službeni glasnik BiH*“, broj 25/09), člana 3. Pravilnika o osnivanju i uvjetima koje moraju ispunjavati skloništa za životinje („*Službeni glasnik BiH*“, broj 27/10), člana 14. stav 30. i člana 24. tačka 27. Statuta Općine Gradačac („*Službene novine Općine Gradačac*“, broj 4/08, 5/12, 1/17 i 4/18) i člana 8. stav 29. Zakona o principima lokalne samouprave u FBiH („*Službene novine FBiH*“, broj 49/06 i 51/09) Općinsko vijeće Gradačac, na prijedlog Općinskog načelnika, na sjednici održanoj dana _____ 2018.godine, d o n o s i

NACRT!

ODLUKU o osnivanju skloništa za napuštene životinje

1. Općina Gradačac (u daljem tekstu Općina) osniva sklonište za napuštene životinje na zemljištu označenom kao:

- k.č.broj 572/1 „UTRINA“ oranica/njiva 5. klase 1130m² i
- dio oko 3000 m² od parcele k.č. 572/2 „UTRINA“ oranica/njiva 5.klase 5979m², (konačna površina će biti određena nakon geodetskog cijepanja parcele) upisane u p.l. broj 20 k.o. Donji Skugrić II kao posjed Općine Gradačac sa dijelom 1/1, a koje po starom premjeru odgovaraju k.č.830/2 i k.č.broj 830/7 k.o.Donje Ledenice upisane u el.zk.ul.371 k.o.SP_Donje Ledenice kao vlasništvo Općine Gradačac sa dijelom 1/1.

2. Općina kao vlasnik zemljišta dozvoljava Udruženju za zaštitu životinja „Balkanska šapica“ Gradačac (u daljem tekstu Udruženje) da u skloništu, na volonterskoj osnovi neometano obavlja sve poslove koji se odnose na zaštitu i zbrinjavanje napuštenih životinja, poslove koje se tiču izgradnje skloništa i prilagođavnje istog zakonskim standardima.

3. Hvatanje, sakupljanje, transposrt, pregled i veterinarasku zaštitu napuštenih, izgubljenih pasa i pasa lualica će obavljati higijenski servis JP Veterinarska stanica d.o.o. Gradačac, savremenim metodama, na human način i bez zlostavljanja, uz primjenu odgovarajuće opreme i prevoznih sredstava, a skladu sa propisima o zaštiti i dobrobiti životinja i veterinarstvu.

4. U roku od 30 dana od dana stupanja na snagu ove odluke između Općine, kao vlasnika zemljišta, Udruženja i JP Veterinarska stanica d.o.o. Gradačac će se zaključiti Sporazum kojim će se detaljno definisati međusobna prava i obaveza potpisnika, kao i način rada i održavanja skloništa.

5. Općina Gradačac će obezbijediti sredstva za krčenje šiblja i djelimično ograđivanje predmetnog zemljišta. Dovod pitke vode i struje, odvod otpadnih voda i ostala ulaganja za normalan rad skloništa će biti definisan Sporazumom.

6. Nakon potpisivanja sporazuma Općina Gradačac - Odsjek za komunalne poslove, JP Veterinarska stanica i Udruženje će bez odlaganja započeti aktivnosti na pripremi dokumentacije i dozvole za formiranje skloništa, na osnovu uputstava koje propisuje nadležno ministarstvo a na prijedlog Ureda za veterinarstvo BiH.

7. Ova Odluka stupa na snagu osmog dana od dana objavljivanja u Službenom glasniku općine Gradačac.

Bosna i Hercegovina
Federacija Bosne i Hercegovine
Tuzlanski kanton
OPĆINA GRADAČAC
-Općinsko vijeće-

Broj:
Datum:

PREDSJEDAVAJUĆI
OPĆINSKOG VIJEĆA

Šakić Enir, prof.

Obrazloženje

Dana, 17.09.2018.godine Službi za geodetske i imovinsko-pravne poslove Općine Gradačac obratilo se Udruženje za zaštitu životinja „Balkanska šapica“ Gradačac zahtjevom za dodjelu zemljišta za izgradnju skloništa za napuštene životinje, navodeći da su kao udruženje izvršili registraciju kod nadležnog ministarstva, dobili ID broj i pečat, te obezbijedili prostor u kome je sjedište udruženja.

Razmatrajući zahtjev podnosioca organ je utvrdio da se moguća lokacija za izgradnju skloništa nalazi na izlazu iz Gradačca, prema Modriči u blizini deponije Višnjik, odnosno na zemljištu označenom kao k.č.broj 572/1 „UTRINA“ oranica/njiva 5. klase 1130m² i 572/2 „UTRINA“ oranica/njiva 5.klase 5979m² upisane u p.l.-u broj 20 k.o.Donji Skugrić II kao posjed Općine Gradačac sa dijelom 1/1, a koje po starom premjeru odgovaraju k.č.830/2 i k.č.broj 830/7 k.o.Donje Ledenice upisane u el.zk.ul.371 k.o.SP_Donje Ledenice kao vlasništvo Općine Gradačac sa dijelom 1/1.

Članom 9. Pravilnika o osnivanju i uvjetima koje moraju ispunjavati skloništa za životinje propisano je da skloništa moraju biti smještene na takvom mjestu da ne narušavaju rad i cjelovitost već postojećih objekata i da ne kontaminiraju okolicu, kao i da su udaljena od naseljenog mjesta najmanje 250-300 metara, što je uvjet koji je u konkretnom slučaju zadovoljen.

Organ je utvrdio da je nemoguće udovoljiti dijelu zahtjeva kojim se traži da se Udruženju dodijeli zemljište za izgradnju skloništa za napuštene životinje, iz razloga što je članom 363. stav 1. Zakona o stvarnim pravima FBiH („Službene novine FBiH“, broj 100/13-u daljem tekstu ZSP FBiH) propisano „*da nekretninama u vlasništvu Federacije, kantona i jedinica lokalne samouprave mogu raspolagati nadležna tijela tih jedinica samo na osnovu javnog konkursa i uz naknadu utvrđenu po tržišnoj cijeni, ako posebnim zakonom nije drugačije određeno.Ova odredba se izričito odnosi i na raspolaganje zasnivanjem prava građenja kojim se opterećuju navedene nekretnine.*“

Članom 363. Stav 3 predviđeno je da „*Prodaja odnosno opterećenje pravom građenja nekretnina u vlasništvu Federacije, kantona i jedinica lokalne samouprave se izuzetno može izvršiti neposrednom pogodbom za potrebe izgradnje:*

- vojnih objekata i objekata za potrebe državnih organa i radi obavljanja njihovih nadležnosti;
- objekata za potrebe stranih diplomatskih i konzularnih predstavništava, njihovih organizacija i specijalizovanih agencija, kao i organizacija i specijalizovanih agencija Ujedinjenih Nacija;
- objekata komunalne infrastrukture;
- objekata vjerskih zajednica i
- radi oblikovanja građevinske čestice

Članom 363. stav 4. propisano je i da „*je dopuštena i neposredna zamjena nekretnina u vlasništvu Federacije, kantona i jedinica lokalne samouprave za nekretninu približno iste vrijednosti u vlasništvu druge osobe.*“

Uzimajući u obzir navedene zakonske odredbe organ je odlučio da u skladu sa članom 28. stav 4. Zakona o zaštiti i dobrobiti životinja osnuje sklonište za životinje na zemljištu iz tačke 1. ove Odluke, te da Udruženju dozvoli da u istom volonterski obavlja sve poslove i aktivnosti koje su vezane za brigu i zaštitu napuštenih životinja (*sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet-član 28. stav 4.).*

Ovom načinu osnivanja skloništa pribjegli se polazeći od činjenice da bi Udruženje za kupovinu predmetnog zemljišta trebalo izdvojiti značajna finansijska sredstva, što bi krajnje rezultiralo odustankom od zahtjeva ili usporavanjem postupka izgradnje skloništa, čija je je potreba za osnivanjem na području općine Gradačac alarmantna. Stoga se odlučilo da Općina kao vlasnik zemljišta osnuje azil, u skladu sa zakonskim odredbama, da finansijski pomogne izgradnju azila, a da Udruženja u svemu tome volonterski obavlja sve poslove koji se odnose na brigu i zaštitu

životinja, kao i da prikupljanjem raznih donacija putem fondacija za zaštitu životinja, učestvuje u izgradnji i radu skloništa.

Nakon usvajanja Odluke nadležni organ općine će izdati dozvolu za formiranje skloništa za životinje, na osnovu uputstava koje propisuje nadležno ministarstvo, a na prijedlog Ureda, te voditi upisnik skloništa za životinje.

Sklonište za životinje finansirat će se iz budžeta općine, te drugih vidova finansiranja (donacije, pokloni itd.), a što će detaljno biti regulisano sporazumom iz tačke 4. ove Odluke.

Članom 36. Odluke o uslovima i načinu držanja pasa, te načinu postupanja sa napuštenim i izgubljenim psima na području Općine Gradačac-u daljem tekstu Odluka („Službeni glasnik općine Gradačac, broj 08/2018) propisano je da se „skloništa za životinje i higijenski servis moraju osnovati u roku od šest mjeseci od dana stupanja na snagu ove odluke“.Navedena odluka je stupila na snagu osmog dana od dana objavljivanja u „Službenom glasniku Općine Gradačac“ od 12.10.2018.godine.

Članom 24. stav 7 Odluke propisano je da „*ukoliko se na području općine Gradačac od strane pravnih i fizičkih lica osnuje sklonište za životinje, međusobni odnosi između higijenskih servisa i tih subjekata (osnivača) regulisat će se sporazumom ili posebnim aktom Općinskog načelnika.*“

Članom 14. stav 30. Statuta Općine Gradačac („*Službene novine Općine Gradačac*“, broj 4/08, 5/12, 1/17 i 4/18) propisano je da Općina obavlja poslove kojima se neposredno ostvaruju potrebe građana, i to naročito poslove koji se odnose na zaštitu životinja.

Općinsko vijeće u okviru svoje nadležnosti donosi pojedinačne i druge akte iz samoupravnog djelokruga u skladu sa zakonom i statutom (član 24. tačka 27).

Članom 8. Stav 3. tačka 29. Zakona o principima lokalne samouprave u FBiH („*Službene novine FBiH*“, broj 49/06 i 51/09)propisano je da „*jedinica lokalne samouprave ima vlastite nadležnosti ustanovljene ustavom i zakonom i ima pravo baviti se svim pitanjima od lokalnog značaja koja nisu isključena iz njene nadležnosti, niti dodijeljena u nadležnost neke druge vlasti na osnovu ustava i zakona.U vlastite nadležnosti jedinice lokalne samouprave posebno spada i zaštita životinja.*“

Problem pasa lualica na ulicama i javnim površinama općine Gradačac je evidentan već nekoliko godina, te se njihov broj iz dana u dan sve više povećava. Općinskim službama je upućen veliki broj žalbi građana, koje su posljedice ugriza i straha, te pričinjene materijalne štete.

Sve veće razmnožavanje i prisustvo pasa lualica na javnim i drugim površima predstavlja problem zajednice, te se imajući u vidu sve navedeno predlaže Općinskom vijeću Gradačac da donese Odluku o osnivanju skloništa za napuštene životinje u predloženom tekstu.

Obrađivač:
Općinska služba za urbanizam,
investicije i komunalne poslove

Predlađač:
Općinski načelnik